



JUDICIAL SYSTEM MONITORING PROGRAMME  
PROGRAMA MONITORIZASAUN BA SISTEMA JUDISIÁRIU

*Komunikadu Imprensa*  
*03 Dezembru 2015*

**Komite CEDAW rekomenda ba estadu Timor Leste atu kontinua fo prioridade ba violénsia kontra fetu no fetu asesu ba justisa**

Iha 20 Novembru 2015, Komite Eliminasau Forma Diskriminasaun Hotu-Hotu Kontra Fetu, (Komite CEDAW) publika nia konkluzau observasaun kona-ba Timor-Leste ninia progresu iha implementasaun *Konvensaun kona-ba Eliminasau Forma Diskriminasaun Hotu-Hotu Kontra Fetu* (CEDAW). Komite halo ona nia observasaun depoisde simu submisaun eskrita hosi Governu Timor-Leste no organizasaun sosiedade sivíl, inklui JSMP. Aliende ne'e, iha Jenebra iha lora 11 no 12 Novembru 2015 Komite mós rona apresentasaun sira hosi Timor-Leste Governu no sosiedade sivíl, no iha sesaun husu no hatan.

Rekomendasaun lubuk ida hosi komite CEDAW subliña Timor-Leste ninia obrigasaun tuir Konvensaun ida-ne'e atu proteje vítima violénsia bazeia ba jéneru no garante sira nia asesu ba justisa.

“JSMP apresia Komite CEDAW konsidera pontu importante sira relaciona ho kestaun sira asesu ba justisa no violénsia kontra fetu ne'ebé durante ne'e JSMP no sosiedade sivíl inklui comunidade barak kestiona. JSMP hanoin katak instituisaun estadu mak iha papél boot liu atu halakon diskriminasaun no asegura kualker polítika ka lei ne'ebé produz la-diskrimina fetu. JSMP espera governu Timor-Leste sei hola asaun imediata atu implementa rekomendasaun hirak ne'e,” dehan Diretór Ezekutivu JSMP, Luis de Oliveira Sampaio.

Timor-Leste ratifika CEDAW sein iha rezervasaun iha tinan 2003. CEDAW rekere katak Estadu Interesada (Estadu Parte) sira foti medidas imediata atu elimina diskriminasaun iha fetu nia vida. Atu implementa obrigasaun tomak tuir CEDAW, Timor-Leste tenke fó pasu sira atu adopta no hatama ninia prinsípiu sira ba iha lei nasionál, polítika nasionál no planu dezvoltamentu nasionál.

Tuir artigu 18 CEDAW Estadu Parte sira iha obrigasaun hato'o relatóriu ba Sekretaria Jéral Nasoes Unidas relaciona ho fatór no difikuldade sira ne'ebé afeta etape kumprimentu obrigasaun iha konvensaun ne'e. Relatóriu primeiru hato'o ona iha tinan 2009 no tempu ne'e Komite CEDAW konsidera relatóriu daruak no datoluk hamutuk.

Komite CEDAW preukupa katak la iha sistema assistensia legál efetivu iha Timor-Leste. Komite rekomenda ba Governu atu hari sistema apoiu legál ne'ebé efetivu atu hatan ba impedimentu ekonómia ne'ebé feto sira infrenta, wainhira asesu ba justisa formal. Tanba ne'e, Komite husu atu hatun ka fo livre taxa judisiál ba feto sira ne'ebé moris iha mukit nia laran.

Komite preukupa ho falta treinamentu no informasaun kona-ba feto ninia direitu no igualidade jéneru ba autór judisiáriu sira. Komite rekomenda ba Governu Timor-Leste atu fornese edukasaun regular entidades sira Governu nian, inklui judisiáriu, atu asegura sira kompriende CEDAW no Komite ninia rekomendasaun sira. Atu asegura igualidade jéneru no avansu (mudansa) ba feto, tenke konsidera CEDAW iha desizun tribunál relevante hotu-hotu no tenke konsidera wainhira dezentolve lei no politika sira hotu-hotu.

Entretantu kona-ba violénsia kontra feto, Komite preukupa kona-ba violénsia doméstika ne'ebé (nivel) aas Timor-Leste, inklui inestu no abuzu seksuál ba feto foin sae sira. Komite subliña nivel kiik-oan atu keisa ka denuncia tanba tauk ba estigmasaun no falta-de konsensializasaun jéral kona-ba natureza hosi krime violénsia doméstika. Komite rekomenda Governu Timor-Leste atu hola asaun atu enkoraza feto atu relata kazu violénsia doméstika sira, no atu garantia katak kazu violénsia doméstika hetan akuzasaun no hetan kastigu ne'ebé adekuaadu. Komite mós subliña importante ba fo indemniza vítima feto no labarik relasiona ho sofrémentu ne'ebé sira hetan.

Komite mós rekomenda atu prioriza Lei Protesaun Testemuña nune'e sasin ba kazu violénsia doméstika bele senti seguru no rehabilita feto iha área rural, garantia asesu ba justisa, médiku no psikolojiku, fatin hakmatek no akonsellamentu. Komite husu atu hasae konsiensia ba feto no mane inklui apoiu hosi autóridade lokal no treinamentu ba autór judisiáriu sira, polísia no autóridade nivel lokal sira atu implementa CEDAW. Timor-Leste tenke hari'i sistema integradu kona-ba dados no relatóriu kona-ba violénsia bazeia ba jéneru.

Timor Leste tenke apresenta fali relatóriu tuir-mai ba Komite CEDAW iha tinan 2019, inklui relatóriu kona-ba ninia progresu implementasaun hosi rekomendasaun sira ne'ebé haktuir iha leten.

Atu hetan tan informasaun, favór ida kontaktu:

Luis de Oliveira Sampaio

Diretór Ezekutivu JSMP

Diresaun e-mail: [luis@jsmp.minihub.org](mailto:luis@jsmp.minihub.org)